



Sesida dals

15 d'avust 2023

Communitgà ils

17 d'avust 2023

Protocol nr.

636/2023

Incumbensa Kappeler

concernent la garanzia dal provediment d'aua per situaziuns extremas futuras

Resposta da la Regenza

La Regenza giuditgescha la situaziun da partenza e las sfidas futuras tar la resursa aua sumegliantamain a quai ch'è vegnì preschentà en l'incumbensa. En singuls secturs èn gia vegnidas prenididas mesiras per pudair dumagnar meglier las sfidas futuras. Uschia ha la Regenza approvà l'onn 2016 in concept per garantir il provediment cun aua da baiver en situaziuns d'urgenza e da mancanzas, ch'è er francà en la Lescha davart la protecziun da la populaziun en il chantun Grischun (Lescha davart la protecziun da la populaziun, LPPC; DG 630.000) ed en l'Ordinaziun tar la Lescha davart la protecziun da la populaziun (ORTLPPC; DG 630.010). Quest concept ha la finamira, ch'ils provediments d'aua pli gronds e mesauns èn abels d'identifitgar sezs las ristgas per il provediment d'aua cun in tool mess a disposiziun da l'Uffizi per la natira e l'ambient (UNA) e da prender las mesiras necessarias a temp. Quest tool acceda a tut las basas digitalas relevantas. Uschia poi vegnir garanti ord vista actuala, che las quantitats d'aua reducidas, pretendidas en cumparegliaziun cun il consument normal, pon vegnir messas a disposiziun per la populaziun tras ils provediments d'aua da baiver mesauns e gronds en cas d'ina greva mancanza u da disturbis incl. setgira. Per pudair mantegnair il provediment en territoris cun pitschens provediments d'aua en cas da setgira u d'auters privels, èn plinavant vegnids procurads recipients da transport, material per conducts, tocs da colliaziun e schizunt stabiliments da preparaziun d'aua. Quest material vegn duvrà en cas d'in eveniment dal servetsch da pichet da la UNA ensemen cun ils corps da pumpiers e cun la Protecziun civila. Quest concept giauda ina vasta renconuschientscha er ordaifer il Grischun. Er en auters secturs, sco p.ex. tar la furniziun d'aua da stizzar fieu u tar la producziun d'energia, èn vegnidas prenididas mesiras correspundentas per pudair furnir las prestaziuns er en fasas da setgira extrema. Pervia dal trend da periodas da setgira pli lungas vegn d'ina vart spetgà in basegn creschent d'aua per sauar ers e

culturas spezialas, ma er prads en l'agricultura. Da l'autra vart han las periodas da setgira pli lungas per consequenza, che funtaunas cun quantitads d'aua che dependen fermamain da precipitaziuns, furneschan damain aua u tschessan schizunt temporarmain. Er auas da surfatscha pudessan siar ora pli savens, almain sin tscherts trajects. Sut quest aspect survegnan il management da l'aua en general e l'exploataziun d'aua sutterrana dal fund da la val sco er la repartiziun d'aua en spezial ina impurtanza creschenta en il futur. Segirar las resursas da l'aua sutterrana per utilisar l'aua da baiver a lunga vista, daventa adina pli impurtant, ma considerond ils impediments qualitativs che smanatschan tras microsubstanzas, tras pesticides e p.ex. tras cumposiziuns alchilicas perfluoradas e polifluoradas (PFAS), adina pli pretensius, uschia ch'igl è gia stà necessari d'adattar l'execuziun da la protecziun da l'aua sutterrana. Tge ch'i dovra ussa en vista a las midadas chaschunadas tras la midada dal clima, sco preschentà en la dumonda, èn analisas da la situaziun, concepts e soluziuns che surpassan ils differents tips d'utilisaziun da l'aua, probablmain er cun prioritaziuns. I po esser che las sfidas futuras pretendan, che problems d'aua ston vegnir tractads da maniera coordinada sur plirs intschess e pia betg mo sin plaun communal, e che reservuars d'auas ston vegnir duvrads en il futur pli savens en moda multifunziunala, quai ch'è p.ex. gia il cas en il Tirol dal Sid. En la Strategia da clima dal Grischun èn la coordinaziun e l'optimaziun da las pretensiuns a l'aua, tar l'augment actual da la setgira da stad, definidas sco secturs d'acziun da l'adattaziun al clima. La Regenza ha previs ina mesira concreta per elavurar questa tematica en la Strategia da biodiversitad dal Grischun (SBD GR), che sa deditgescha en ina metoda multilateralal al tema dal management integral da l'aua. Plinavant prevesa la Regenza d'integrar in punct central da svilup cun il titel «Strategia da l'aua» en il proxim program da la Regenza 2025–2028.

Sa basond sin questas explicaziuns propona la Regenza al Cussegl grond d'acceptar questa incumbensa.



En num da la Regenza

Il president:

Peter Peyer

Il cancellier:

Daniel Spadin